

塔影園集

東方學會印

塔影園集卷一

吳郡 顧 苓 云美

文公子傳

文公子名乘字應符禮部侍郎兼東閣大學士謚文肅公之仲子也幼倜儻能文章年十六補諸生崇禎內子將試應天而文肅公薨既免喪頗託跡聲伎陰結客故人問遺隨手散盡乙酉五月之變出信國公畫像懸中堂朝夕起居意若有所經營者思文皇帝即位福建改元隆武遣吳江孫某密召前總督漕運都御史路振飛于太湖中主吳趨趙生家趙生素善公子出孫某所齋登極親征二詔出示公子公子慨然曰吾有君矣趙生隨孫某入福京公子具表自陳世受國恩將糾結草澤應援之師狀上相國黃道周陳洪謚書趣王師西征封以蠟丸珍重投趙生趙生

許諾既出門毀棄之及抵福京以父官吏部得官踰年以謾語報公子信之遂集故所結客治兵太湖中湖中義士亦共推公子丙戌六月部署將發土國寶伺湖中事刺得狀急發卒捕公子被獲連所親數人公子語國寶曰吾一人事事不成死耳彼皆不得與聞國寶悉遣所親而令公子招餘衆以贖死公子罵曰吾有死不為若用先是公子姊丈兵部主事嚴拭于乙酉六月起兵常熟不克棄去國寶疑兩人共事招主事書曰君來任公子則生之主事至國寶與言所以任公子者辭不與聞公子亦堅請死遂以是月二十六日被殺年二十九死之先一夕賦詩云閨閨名家舊姓文一身許國死誰聞忠魂今夜歸何處明月灘頭卧白雲死之日過其甥顧苓家與妻子訣飲食如平時懸首閭門越一日猶視國寶從城外來望見惡之函送主

事以歛死之日流星墜所陳尸寺中

論曰翟義有言為宰相子死國埋名固其所也不亦亮哉

常州府學生董君傳

崇禎甲申賊入京師皇帝殉社稷羣臣有降賊者宏光皇帝即位南都議討賊命刑部仿唐六等定罪治之國家新立議用輕典有武進諸生董元哲奮曰人臣無將將則必誅況身既臣賊雖脅從者殺無赦草議數千言具有原委君子避之明年五月南京陷士民俱辮髮君獨不可不食數日而病病百餘日而卒卒之日賦詩云首陽千古風猶在欲往從之但有心國家養士三百年運阨陽九草莽學校中尤多風義之士云當是時四郊多壘逆鄙內訌議用輕典而賊臣陳名夏猶北走請入寇以為一身計左都御史劉宗周疏論總兵官劉澤清高傑以軍法罪可斬澤清

抗疏請誅宗周欲興晉陽之甲君之議必不可行矣必不可行則必不可無此議孔子沒而微言絕七十子喪而大義乖議在草莽學校中亦猶七十子之義也君字濬之更字質明年十六補諸生以孝友聞事父母及王父起居湯藥惟謹工時藝試輒冠其曹郡邑之士問業者戶外屨恒滿京師初陷即避地南村草茨圭華種葵剪韭時拊膺三歎泣數行下南都繼陷則日夜號哭終以身殉年二十有八嗚呼君真不誣其志矣彼從賊之臣地下見君能無愧乎

處士張綏子傳

萬厯天啟崇禎間張孝節先生以道德文章伏一世與其同年周忠介公朱孝介先生門人姚文毅公文毅公之舅氏文文肅公持身束物內外軒軒激濁揚清天下大丈夫士

謂之吳門五君子孝節先生齒最長最後沒沒時崇禎十
四年後三年京師亂明年南都不守五君子之子各棄前
資絕進取閉門不仕其一曰綏子張君孝節先生之仲子
也君胚胎前光目濡耳染不離風節名教之內弱冠補諸
生時中丞御史監司郡邑多造請孝節先生先生高卧遣
君往謝中丞御史監司郡邑皆歛容禮之代先生條對兵
荒利病官民得失因革便不便暢曉中竅的聲名籍甚先
生既沒免喪方卒業辟雍而天下亂君以強仕之年側身
懷古婆婆嬉遊不復與人事者二十八年而卒先是先生
得元處士淶水園而葺之引流種竹中構假我堂君復營
其東偏堂室精好未幾而世變息交鬻宅自養栖於先祠
而文肅文毅之家午橋綠野綽楔烏頭之下亦不名一椽
國破家亡固其所也君姊夫顧咸建知錢塘縣杭州失守

從容引去略地者跡捕錢塘不得移略蘇州者株連逮君
君不告所在責君曰肺腑至親而不知所在人情乎君曰
肺腑至親而以所在告亦非人情終不言而錢塘出乃免
錢塘之被殺也杭州之人哭之如私親後二年君長子婦
翁楊廷樞亦以義死人以此稱孝節先生之風義不獨及
其子也君諱奕字綏子子四人皆讀書先生諱世偉字異
度中萬厯壬子科舉人特贈翰林院待詔其友誄之私謚
孝節先生

靈巖退翁和尚別傳

翁名宏儲字繼起南通州人姓李氏娶妻生子妻子死舍
俗出家崇禎乙亥得法於三峯藏禪師年三十一遂住名
山登法席辛巳入天台久之卓錫於蘇州靈巖之崇報院
院久廢經營整飭殿閣莊嚴書屋山曰天上靈巖又曰大

光明幢藏時世界種名其堂曰大鑑曰明月其庵曰明白
像設獨在殿上更定施食科儀三月十九日必率徒衆為
烈皇帝及諸死國大夫士脩齋誦經淚出如雨歲首為其
親師亦如之與人言必依忠信好問禮法惡人之不忠不
孝不遵典禮者詩文得唐宋大家風氣書間學晉人予最
愛其冬雪詩只為六朝遺老懼隔江堆沒舊時山之句一
時檀施雲集瓢鉢蕭然遺民處士或倚為薇蕨資前大學
士熊開元戶部尚書張有譽處士趙庚皆為得法弟子春
坊韓羅受鉗錘久既死乃著落庚子秋住虎邱馬國博端
言欲為虎邱修舉廢墜必資大貴人力翁言大貴人皆石
火電光其言大率如此虎邱進院日瞻禮者數萬人前兵
部主事毘陵某私覲不及明日投書抵觸構釁未已忽得
噩夢夜半來叩寺門禮足求懺悔請法名而去辛丑春于

靈巖大悲閣上修懺將畢縑素大集有後至爭席者怙勢
懷憤將侵擾道場是夕有光起閣上冉冉入雲照耀下方
其人愕然愧悔出錢飯僧翁具天人相面如滿月所至圍
繞作禮常住南嶽往來數千里沿途瞻仰晝夜不絕楚人
語余翁在南嶽當路以金錢供養者多不納窮鄉眈夫終
歲勤動餘一斛二斛米肩負出山輸妻常住得一見頂禮
歡喜讚歎真不可思議翁乃遽歸靈巖不復去壬子正月
名王女自廣西遣人迎翁及秋人船敦促翁遂示疾人船
既去病良已即不食八月二十日屈指數日至七而止二
十七日午後索水浴浴已更衣端坐而逝

系曰翁知余不學佛每相見輒多調謔今年正月過靈巖
語予曰吾兩人孰先死居士先死我為居士說法設我先
死居士為我作碑記相視一笑不意蒲柳未枯松柏先落

憶初見翁翁手如意屬予篆崇禎甲申字于上八月養疾方丈又屬子豫銘其龕曰吳僧靈巖退翁故為作靈巖退翁別傳

太醫院吏目沈君傳

沈君諱頌字朗仲美髯秀碩自幼不肯治舉子業喜神農氏之學黃帝扁鵲之書受業于徐恂庵李士材切脉處方為人治病決生死多驗崇禎十一年授太醫院吏目不赴居數年而天下方亂兵駐蘇州無貴賤主客文武悉就君及錢塘人劉默生所治病各有驗精良兩人齊名日錄所治病何縣里人何病醫藥已其病之狀何如作療病類案後默生將治病太倉鬼嘯于病者之榻曰劉生來吾事不濟矣其一曰不如先殺劉生明日默生入室將診暴病卒于是獨有君診病知人生死決嫌疑定可治及藥論甚精

著病機合論若干卷付其門壻陸其清藏于家庚戌十一月受戒于靈巖儲和尚作出世因明年正月遂卒年六十有九君寫字賦詩畫山水小景皆有法以治病掩其它長君始祖孟新其弟孟淵生當國家隆盛之時為吳中風雅之祖孟淵子貞吉恒吉子周世所稱石田先生代有清操隱德而孟新之孫鎧中成化壬辰進士官禮部主事主事曾孫柱臣以明經司訓滁州實生公二百年來幽閨婦女草野小人皆知石田先生而學士大夫不能舉禮部主事名君幼謝進取而名綴御院身齊逸民名士風流在此不在彼也

蔡子強傳

蔡子名上珍更名健字子強巡撫山西都御史死難諱懋德蔡公第三子介明之子也介明生四子三子俱殤于子

強愛護有加督課勤雖年少已自成人能文及詩嶄然見
頭角人謂蔡氏有子矣年二十既婚得瘵疾使醫治之不
效醫知其不可為不以告益進藥病益亟乃死介明哭之
慟曰吾子益進藥而藥殺也嗚呼自古及今進藥而病益
亟以至於死者未必皆以藥敗知病之不可為而進藥藥
進而病益亟以至於死即曰進藥而藥殺者亦猶春秋之
例也春秋傳晉景公疾求醫於秦秦伯使醫緩為之未至
公夢疾為二豎子曰彼良醫也懼傷我焉逃之其一曰居
育之上膏之下若我何醫至曰疾不可為也攻之不可達
之不及藥不至焉不可為也公曰良醫也厚為之禮而歸
之六月晉侯卒晉平公疾求醫於秦秦伯使醫和視之曰
疾如蠱非鬼非食不可為也趙孟曰良醫也後十年晉侯
卒於平為入治病者觀此可以戒矣藥以治病藥不得至

則病不去雖十年不死良醫不為也況旦暮且死知其不可為而為之與不知其不可為而為之均不免于進藥而藥殺為人治病者不可不知春秋也春秋傳曰舍藥物可也於乎可哀也已可哀也已

東澗遺老錢公別傳

公諱謙益字受之中萬厯三十八年庚戌科進士第三人先是萬厯二十一年奉並封三王之命顧涇陽先生為吏部主事疏爭甚切又移內閣書尋被謫已而召還復削籍歸講學于東林書院天下士大夫之進德脩業敦尚風節及為國本拜杖謫戍革職降調者皆歸之故時稱東宮為大東東林為小東我國家門戶之分始于此貞皇帝即位盡召還諸君子公以遭憂還家十年未出出補翰林院編修管理誥勅撰文天啟元年典浙江鄉試既報命尋以病

乞假四年升左春坊左諭德兼翰林院編修充經筵日講
官歷詹事府少詹事纂修神宗皇帝實錄當閣人用事凡
當日之爭國本究榷擊議紅丸請移宮者盡目為東林黨
人各以他事考死禁錮追家財奪誥命公既與諸君子游
於楊忠烈公誼尤篤得除名烈皇帝即位公與文文肅公
姚文毅公同日賜環除詹事府詹事禮部右侍郎兼翰林
院侍讀學士上銳意求治注意閣員會推及公而溫體仁
周延儒不得與延儒嫉體仁追論公浙江典試事廷辯不
白天下謂之閣訟竟削籍延儒體仁相繼入閣復相軋延
儒罷去于是大夫士之尚風節談經濟者以及諸生老將
盡在公門矣體仁慮公之復出也與常熟奸民張漢儒比
漢儒以宅事訐公及瞿文忠公于朝連繫刑部獄已厥衛
以蜚語聞盡得漢儒輩奸狀體仁罷去公得解既而鳴鏑

銅馬騷動中外江南士民為桑土計者欲叩閭援豫楚例請公備禦東南上亦于甲申三月十一日賜環召公而遇十九日之變山東河南各藩先後南下獨潞王已渡江公議推戴討賊而提督鳳陽僉都御史馬士英先會各路總兵官移書南京部院迎福王于江浦福王即位召公禮部尚書協理詹事府事充經筵日講官公疏言四事曰嚴內治定廟算振紀綱恤人材而恤人材有三曰資幹濟雪冤滯拯流移前此異同藩棘一旦破除非得已也以恩例加太子太保宏光元年二月請修國史疏曰臣壯歲登朝留心史事二十餘年揚扅討論差有端緒昔宋臣司馬光編修歷代通鑑乞就冗官以書局自隨臣願以先例即家開局上命在任料理尋改掌部事四月癸酉揚州告急上召對百僚公請收用都督陳洪範上曰國家未嘗不收人收

來皆不得其用君臣默然而罷時洪範使北歸已受北劄
招諭江南公不知也上疏請自督師救揚州不許五月初
十辛卯夜上出狩洪範輩給公以南宗金人之約公信之
人多就公謀進止公曰事至此惟有作小朝廷求活耳擬
致書北軍前移草于總督京營戎政忻城伯趙之龍之龍
屏不用竟以降表去公泣語其館賓沈明掄曰子憶朱勝
非事乎未知得為朱勝非否洪武門開慟哭而出北師入
京乃謬為招諭陰圖伺隙不得而行文種范蠡之事計復
不售北軍挾之去以前資浮沈數月自免歸送公歸者起
兵山東被獲因得公手書并逮公銀鐙三币至北乃解歸
以隱語作楸枰三局寄廣西留守太保瞿公洗眼藥方寄
舊輜新建姜公帛書蠟丸梯山航海戊子五月為人牽引
有江甯之逮頌繫踰年復解會安西將軍李定國以永歷